

L'insaina da Müstair vain restaurada



Il crucifix vi da quista chasa es l'insaina da Müstair.

FOTOGRAFIA VALENTIN PITSCH



Pel mumaint sun ils ils duos crötschs süsüm la fatschada vöds.

FOTOGRAFIA DAVID TRUTTMANN

DA FLURIN ANDRY/FMR

■ **Üna da las particularitads da Müstair es il grond crucifix chi'd es normalmaing pendü vi da la fatschada d'üna chasa immez cumün. Quel crucifix dal temp baroc vain actualmaing restaurà giò la Svizra bassa.** Las plü veglias fotografias cha'l proprietari da la chasa cul crucifix d'immez Müstair *Roland Böhmer* cugnuscha sun d'intuorn l'on 1900: «Da quel temp nu d'eira il crucifix però amo pendü sü, dimpersè in pe pozà cunter la fatschada», declera l'istoriker d'art ed archeolog. El chi'd es oriund da Turich d'eira gnü sü avant üna trentina d'ons per far ün praticum sco archeolog illa clostra da Müstair. Pac plü tard vaiva'l vis cha quista chasa d'eira vnala e decis da tilla cumprar.

El ha cumprà la chasa da l'on 1989 e cun ella eir il crucifix chi varà sco ch'el stima üna lunghezza da var trais meters: «I's tratta d'ün crucifix baroc, survart as vezza a Gesu e suovart a Maria», explichescha il perit. Il baroc es ün'epoca da l'istorgia d'art europeana chi ha cumanzà a la fin dal 16avel tschientiner e dürà fin circa dal 1760/70.

Culla chasa eir il crucifix

«In quella chasa d'eira aint la furnaria da l'uschedit pechin Jaquan Selm chi ha fat qua pan d'ürant ün mez tschientiner», disch Roland Böhmer, «dal 1924 fin 1974, il fuorn es amo in furnaria, il chamin chi passaiva a l'extern sü da la fat-

schada manca però.» El ha cumprà la chasa da l'on 1989 e cun ella eir il crucifix chi varà sco ch'el stima üna lunghezza da var trais meters: «I's tratta d'ün crucifix baroc, survart as vezza a Gesu e suovart a Maria», explichescha il perit. Il baroc es ün'epoca da l'istorgia d'art europeana chi ha cumanzà a la fin dal 16avel tschientiner e dürà fin circa dal 1760/70.

La culur veglia as spletschaiva

Pel mumaint nu penda ingün crucifix vi da sia chasa pro'l Plaz d'Immez a Müstair: «La culur nun es plü buna, per

part crodai'la davent, impustüt pro'ls peis e'ls gialuns da Cristus», disch l'archeolog ed istoriker d'art, «perquai es il crucifix uossa a Jona ill'ufficina dals restauratuors Fontana&Fontana.» El chi ha lavurà 25 ons sco archeolog illa Clostra Son Jon ed imprais eir rumantsch, surpiglia svesa ils cuosts per quista restauraziun. «Quant chi cuostarà nu saja da dir, eu nun ha amo survgni l'offerta.» Quant lönych düraran las lavuors? «Il crucifix sarà restaurà e pront per tornar a Müstair in ün on», infuorma Roland Böhmer.

«Üna grondiusa nouva»

Il magister pensiunà *Valentin Pitsch* chi maina als giasts tras cumün es creschü sü a Müstair. El s'algorda amo da las cartolinas da Müstair chi vaivan sü plü bod il crucifix vi da la chasa culla furnaria: «Quist crucifix es in mia memoria adüna stat alch chi toccaiva pro Müstair», disch el, «a mai para perquai grondius cha Roland Böhmer lascha restaurar il crucifix, quai nu fess minchün.» Chi saja allegraivel cha quista particularità da Müstair torna darheu in cumün e vi da la fatschada da la chasa dal pechin, ha'l agiunt.

Il post da pulizia a Martina serrà

E la chasa d'abitar e d'affar Ratsches 230 vnala

DA FLURIN ANDRY/FMR

■ **La strategia immobiliare da la Pulizia chantunala concentrescha seis posts sün centers regionalis, perquai nu douvra ella plü tuot seis posts. Ün da tals es quel a Martina.** Per incumbenza da la Regenza ha la Pulizia chantunala dal Grischun reorganisà ingon sia structura dals posts e dal personal. In sia comunicaziun correspondentia scriva la pulizia ch'ella haja sviluppà inavant sia organizaziun dal corp e sia structura da posts da pulizia. Üna consequenza da l'optimaziun dals process da lavur da la pulizia chantunala pertocca ils posts da pulizia: Cun as concentrar sün centers regionalis nu douvra ella plü tuot seis posts. Quai vala eir pel post da pulizia a Martina. Perquai til venda il Chantun uossa.

Trais abitaziuns e localitads per büros Responsabel per l'economisaziun da tutot las immobiliare in proprietä chantunala es l'Uffizi chantunala da construcziun ota. «L'uffizi vain in accziun cur chi'd es da fabricar novas immobiliare, cur chi's renovescha quellas o eir cur chi's tillas venda», declera *Stefan Müller* chi maina il management dal portofolio chantunala, «la chasa a Martina ingio chi d'eira aint il post da pulizia es ün object

chi fa part da quist portofolio.» Siond cha la pulizia chantunala nu tilla douvra plü ha ella surdat la chasa a l'Uffizi da construcziun ota per tilla vender. «I's tratta d'üna chasa chi'd es gnüda fabricada da l'on 1972, sper las localitads per büros cuntegna ella eir duos abitaziun da 4 stanzas e mez e suot il tet ün'abitaziun da 2 stanzas», disch el. L'uffizi responsabel ha plüssas jadas renovà ed eir ingrondi la chasa.

Per s-chars ün milliun francs

«In chasa sun localitads per büros e davant quella piazzas da parcar, quai spordschess la pussibilità da drivir e manar in chasa ün affar», cuntinescha Müller, «e siond cha'l terrain intuorn chasa tocca eir amo pro quella es l'object sgür adattà eir per famiglias.» La chasa Ratsches 230 a Martina es gnüda stimada. Sia valor commerciala s'amunta a 996 600 francs. L'Uffizi da construcziun bassa soula vender sia immobiliare a quel chi spordscha il plü bler. «Quai cha no fain eir adüna es da dar al cumün e'ls vashins il dret da precumprita pel predscha da quel chi offerischa il meglter.»

Las infurmaziuns davart la chasa e'l predscha as chatta i'l internet sülla pagina: www.hochbauamt.gr.ch.



La chasa Ratsches 230 a Martina cun trais abitaziuns, büros e garaschas es vnala.

FOTO ERICA MÜLLER

■ CORONA

Tests a Samedan

(fmr/rtr) Il center da test in l'Ospital d'Engiadina'Ota a Samedan es gnü declerà sco center da test da corona uffizial pel Grischun dal süd.

Ils process e l'infrastructura necessaria existan fingià daspö il principi da la pandemia. La fin d'october haja l'Uffizi chantunala da sandà surdat l'incumbenza a l'ospital, sco cha la Fundaziun pel proviediment da sandà Engiadina'Ota comunicescha. Il center da tests a Samedan es in funcziun fingià daspö prüma-vaira. Per laschar far il test esa obligatoric da s'annunzchar e lura as survegna ün termin.

■ PS ENGIADINA

Per ün muond plü uman

(cdm/fmr) La fin da november van in votaziun duos iniziativas federalas. Il parti socialdemocrat d'Engiadina Bassa sustegna tuotot duos iniziativas, sco ch'el scriva in üna comunicaziun. La proposta per la responsabilità multinaziunala pretenda cha grondas impreais svizras respettan ils drets umans e protegian l'ambiant, eir a l'ester. L'iniziativa a regard il commerzi cun material da guerra voul impedir cha raps svizzers vegnan dovrats per finanziar la producziun da material da guerra.